

Vrhovni sabor Islamske zajednice u Socijalističkoj Federativnoj Republici Jugoslaviji na svom zasjedanju održanom na dan 5. novembra 1969. godine donio je

USTAV
ISLAMSKJE ZAJEDNICE U SOCIJALISTIČKOJ FEDERATIVNOJ REPUBLICI
JUGOSLAVIJI

OPŠTE ODREDBE

Član 1.

Islamsku zajednicu u Socijalističkoj Federativnoj Republici Jugoslaviji sačinjavaju svi pripadnici Islamske vjere, građani Socijalističke Federativne Republike Jugoslavije.

Član 2.

Cilj je Islamske zajednice da čuva i razvija vjerski život među pripadnicima Islama.

Islamska zajednica postizava svoj cilj:

- 1) naučavanjem Islama i vjerskim obučavanjem;
- 2) staranjem o vjerskom vaspitanju pripadnika Islamske zajednice;
- 3) održavanjem predavanja (vazova);
- 4) izdavanjem udžbenika i časopisa, izdavanjem i širenjem vjerskih knjiga i drugih publikacija;
- 5) osnivanjem i održavanjem džamija, vjerskih škola i drugih islamskih ustanova;
- 6) spremanjem i uzdizanjem vjerskih službenika i
- 7) svakom drugom djelatnošću usmjerenom na vjersko uzdizanje pripadnika Islama.

Član 3.

Islamska zajednica slobodno ispovijeda i uči svoju vjeru, slobodno vrši vjerske obrede i druge dužnosti.

Islamska zajednica samostalno upravlja i uređuje svoja vjerska, vjersko-prosvjetna, vakufska i druga pitanja.

Član 4.

Islamska zajednica upravlja se po propisima Islama, po odredbama ovoga Ustava i drugim na osnovu ovoga Ustava izdatim propisima.

Ništavna je svaka odluka ili propis kojim bi bila povrijeđena načela Islama. Kojom odlukom ili propisom su povrijeđena ta načela utvrđuje Vrhovno islamsko starješinstvo na sjednici kojoj je prisutno najmanje tri četvrtine članova i o tome izdaje obrazloženo rješenje.

Član 5.

Svaki vakuf, odbori, starješinstva, sabori, Vrhovno islamsko starješinstvo, Vrhovni sabor Islamske zajednice i Centralna imovinska uprave Islamske zajednice su pravna lica, kao i ustanove kojima to svojstvo odrede sabori, odnosno Vrhovni sabor.

Pravna lica vrše svoja prava i dužnosti u okviru odredaba ovoga Ustava i statuta.

Član 6.

Svako fizičko i pravno lice može u duhu šeriata osnivati vakufe. Odluka o osnivanju vakufa je pravno valjana, ako je odobri Starješinstvo.

Član 7.

Odredbe vakufnama moraju se izvršavati po propisima šeriata.

U slučaju kada vakufnama ili pojedine njene odredbe više ne služe ciljevima Islamske zajednice, zatim kad prestane svrha određena vakufnamom, starješinstvo Islamske zajednice, na predlog odbora Islamske zajednice donijeće odluku o prestanku vakufa i o upotrebi njegove imovine u smislu šeriatskih propisa.

Na ovaj će se način pod istim pretpostavkama postupiti i sa vakufima bez vakufnama za koje inače važe postojeći običaji (teamuli-kadim).

Vakufnamama stečena prava na vjerske i druge službe u Islamskoj zajednici poštovaće se ukoliko nosioci tih prava imaju odgovarajuće kvalifikacije po propisima Islama i posebnim propisima izdatim od nadležnih organa Islamske zajednice.

Član 8.

Nikakvo službeno mjesto ni položaj u Islamskoj zajednici ne može se popuniti licem koje nema za to propisane kvalifikacije.

Ni jedno lice koje vrši vjersku službu ne smije obavljati poslove koji nisu u skladu sa vjerskim pozivom i ugledom, kao i ugledom Islamske zajednice.

Niko ne može vršiti stalno vjersku službu bez postavljenja, a ni povremeno bez odobrenja nadležnog organa Islamske zajednice.

Član 9.

Vrhovno islamsko starješinstvo propisuje nošnju i druge znake vjerskih službenika.

Član 10.

Svaki pripadnik Islamske zajednice ima pravo žalbe protiv odluke organa Islamske zajednice, ako mu je tom odlukom povrijeđeno pravo ili lični interes zasnovan na ovom Ustavu, ili drugim nadležno izdatim propisima.

Isto tako svaki organ Islamske zajednice ima pravo žalbe protiv odluke neposredno višeg organa.

Žalba se podnosi u roku od 15 dana od dana prijema rješenja, ukoliko posebnim propisima nije drukčije određeno.

Član 11.

Vrhovno islamsko starješinstvo izdaje časopis za raspravljanje vjersko-prosvjetnih pitanja u okviru ciljeva Islamske zajednice i za objavljivanje opštih akata.

Član 12.

Zastava Islamske zajednice je zelena sa bijelim polumjesecom i bijelom petokrakom zvijezdom u sredini.

Dužina zastave u odnosu na širinu mora biti u srazmjeri 2:1.

Vrhovno islamsko starješinstvo donosi propise o upotrebi zastave Islamske zajednice.

Član 13.

Svi organi Islamske zajednice imaju službeni pečat. Oblik i tekst pečata propisuje Vrhovno islamsko starješinstvo.

IMOVINA ISLAMSKE ZAJEDNICE

Član 14.

Imovina Islamske zajednice sastoji se:

- 1) od vakufa i druge pokretne i nepokretne imovine koja pripada njenim organima i ustanovama kao i od prihoda te imovine;
- 2) od samodoprinosu i drugih priloga pripadnika Islamske zajednice;
- 3) od fondova i njihovih prihoda;
- 4) od poklona i vasijeta;
- 5) od prihoda za vjerske usluge i taksi za obavljanje administrativnih radnji;
- 6) od državne pomoći, i
- 7) od raznih drugih prihoda.

Član 15.

Imovina Islamske zajednice služi isključivo njenim ciljevima i ne može se u druge svrhe upotrebljavati.

Sabori Islamske zajednice propisuju način upravljanja imovinom Islamske zajednice u okviru načela koja određuje Vrhovni sabor.

ORGANI ISLAMSKJE ZAJEDNICE

Član 16.

Organi Islamske zajednice su:

- 1) odbori Islamske zajednice;
- 2) muftije;
- 3) sabori Islamske zajednice;
- 4) starješinstva Islamske zajednice;
- 5) Vrhovni sabor Islamske zajednice u SFRJ;
- 6) Vrhovno islamsko starješinstvo u SFRJ i
- 7) Reis-ul-ulema.

ODBOR ISLAMSKJE ZAJEDNICE

Član 17.

Odbor Islamske zajednice je osnovni organ Islamske zajednice na svom području. On se stara o svim pitanjima vjerskog života i ostalim potrebama Islamske zajednice.

Pomoćno tijelo odbora Islamske zajednice je džamijski odbor.

Mutevelije na području odbora upravljaju povjerenim im vakufima.

Član 18.

Odbor Islamske zajednice naročito:

- 1) stara se o organizovanju i vršenju vjerske obuke;
- 2) stara se o izgradnji i održavanju džamija, mesdžida kao i održavanju i čuvanju grobalja i imovine Islamske zajednice, te njenoj pravilnoj upotrebi za ciljeve Islamske zajednice;
- 3) upravlja vakufima i drugom imovinom u skladu sa odredbama ovoga Ustava i drugim propisima;
- 4) postavlja i razrješava džamijske odbore i mutevelije, i vrši nadzor nad njihovim radom;
- 5) stara se o organizovanju prikupljanja priloga i drugih prihoda za potrebe Islamske zajednice;
- 6) donosi budžet i završni račun i dostavlja ih na odobrenje starješinstvu Islamske zajednice;
- 7) zastupa interese Islamske zajednice pred sudom i drugim organima i organizacijama u okviru datih mu ovlaštenja;
- 8) odobrava budžete samostlanih i ujedinjenih vakufa do iznosa koji odredi starješinstvo;
- 9) daje mišljenja za postavljanje imama i drugih vjerskih službenika i
- 10) obavještava pripadnike zajednice na svom području o svome radu.

Član 19.

Odbor ima 5-15 članova ovisno od broja pripadnika Islamske zajednice na dotičnom području.

Od toga broja treba, po mogućnosti, da bude jedna trećina sa vjerskom naobrazbom.

Broj članova u pojedinom odboru određuje starješinstvo. Imam koga odredi starješinstvo je vjersko-prosvjetni referent i član odbora po položaju. Predsjednika i ostale članove imenuje sabor po odredbama statuta.

Član 20.

Osnivanje, spajanje i ukidanje odbora kao i područja i sjedišta odbora određuje sabor odlukom.

MUFTIJE

Član 21.

Muftija je glavno vjersko lice Islamske zajednice na svom području.

Za muftiju može biti izabrano lice koje ima najmanje više teološko obrazovanje i najmanje pet godina vjerske službe u Islamskoj zajednici.

Član 22.

Muftiju bira i razrješava sabor na predlog starješinstva uz prethodnu saglasnost Vrhovnog islamskog starješinstva.

Muftija, po potrebi službe kao i po molbi, može biti premješten na drugo područje. Odluku o tome donosi sabor.

Član 23.

Područje i sjedište muftija određuje sabor.

Član 24.

Muftija naročito:

- 1) stara se o širenju poznavanja islamske nauke među pripadnicima Islamske zajednice;
- 2) predlaže Vrhovnom islamskom starješinstvu da daje obavezne tumačenja (fetvu) o određenom vjerskom pitanju;
- 3) stara se o organizaciji i održavanju vjerske nastave;
- 4) vodi brigu o pravilnoj primjeni šeriatskih i drugih propisa Islamske zajednice;

- 5) vodi nadzor nad pravilnim odvijanjem vjerske nastave;
- 6) daje predlog za postavljanje imama, bula, i vrši nadzor nad njihovim radom;
- 7) vrši nadzor nad radom imama i drugih vjerskih službenika;
- 8) vrši i druge poslove određene statutom i
- 9) predstavlja Islamsku zajednicu na svom području.

Član 25.

Muftija je dužan da o svome radu podnosi izvještaje starješinstvu na zahtjev, a najmanje dva puta godišnje.

Muftija može prisustvovati sjednicama odbora, starješinstva i sabora.

SABOR ISLAMSKE ZAJEDNICE

Član 26.

Sabor Islamske zajednice je najviši organ Islamske zajednice na svom području. Islamska zajednica u SFRJ ima četiri sabora, i to:

- 1) Sabor Islamske zajednice u Sarajevu za područja Socijalističke Republike Bosne i Hercegovine, Socijalističke Republike Hrvatske i Socijalističke Republike Slovenije;
- 2) Sabor Islamske zajednice u Prištini za područje Socijalističke Republike Srbije;
- 3) Sabor Islamske zajednice u Skoplju, za područje Socijalističke Republike Makedonije, i
- 4) Sabor Islamske zajednice u Titogradu, za područje Socijalističke Republike Crne Gore.

Sabor u Sarajevu ima 30 članova, u Prištini 29, u Skoplju 20 i Titogradu 16.

Vrhovni sabor može mijenjati broj članova pojedinih sabora. Najmanje jedna trećina članova sabora, po mogućnosti, treba da ima vjersko obrazovanje.

Sabori Islamske zajednice biraju se na četiri godine.

Članove sabora biraju pripadnici Islamske zajednice na način određen statutom.

Član 27.

Sabor Islamske zajednice:

- 1) donosi statut Islamske zajednice uz saglasnost Vrhovnog islamskog starješinstva, i donosi druge propise;
- 2) raspravlja i odlučuje o svim potrebama Islamske zajednice;
- 3) određuje smjernice za rad svih organa Islamske zajednice na svom području;

- 4) reguliše sva pitanja u skladu sa ciljem Islamske zajednice, načelima Islama i odredbama ovoga Ustava koja nije regulisao Vrhovni sabor Islamske zajednice ili Vrhovno islamsko starješinstvo;
- 5) donosi budžet i odobrava završni račun;
- 6) razmatra i odobrava izvještaje starješinstva o njegovom radu;
- 7) osniva ustanove;
- 8) bira, opoziva i razrješava članove starješinstva;
- 9) bira, premješta i razrješava muftije;
- 10) imenuje i razrješava članove odbora Islamske zajednice;
- 11) određuje za koje se administrativne radnje plaća taksa Islamskoj zajednici i u kojem iznosu, kao i za koje vjerske usluge se plaćaju pristojbe;
- 12) vrši ostale poslove koji su mu ovim Ustavom, propisima Vrhovnog sabora ili statutom stavljeni u nadležnost.

Ako određeno pitanje Vrhovni sabor ili Vrhovno islamsko starješinstvo, u okviru svoje nadležnosti, kasnije reguliše drukčije od onoga što je propisao sabor, prestaje važnost propisa sabora.

Član 28.

Propisi i druge odluke sabora ne mogu biti u suprotnosti sa odredbama ovog Ustava, sa propisima i odlukama Vrhovnog sabora i propisima koje je donijelo Vrhovno islamsko starješinstvo u okviru svoje nadležnosti.

Ako Vrhovno islamsko starješinstvo smatra da je neka odluka ili propis sabora suprotan Ustavu ili odlukama, odnosno propisima organa iz prethodnog stava, dužno je da takvu odluku ili propis zadrži od izvršenja i da zatraži da o tome konačno odluči Vrhovni sabor na prvom narednom zasjedanju.

STARJEŠINSTVO ISLAMSKJE ZAJEDNICE

Član 29.

Starješinstvo Islamske zajednice je izvršni organ sabora Islamske zajednice.

Starješinstvo Islamske zajednice sačinjavaju: predsjednik i određen broj članova sabora. Predsjednik i određeni broj članova starješinstva moraju imati vjersku naobrazbu. Broj članova starješinstva kao i broj članova sabora sa vjerskom naobrazbom koji ulaze u starješinstvo utvrđuje sabor prilikom izbora starješinstva.

Član 30.

Članove starješinstva bira i razrješava sabor.

Mandat članova starješinstva Islamske zajednice traje dokle i mandat sabora.

Predsjednika starješinstva bira i razrješava Vrhovni sabor na predlog Reis-ul-uleme.

Starješinstvo vrši nadzor nad radom vjerskih škola u skladu sa statutom kao i opšti nadzor nad radom tečajeva i nad vjerskom obukom.

Član 31.

Predsjednik starješinstva predstavlja Islamsku zajednicu na svome području.

Starješinstvo naročito vrši ove poslove:

- 1) rukovodi svim vjerskim i imovinskim poslovima Islamske zajednice i u tom pravcu nadzire rad nižih organa i ustanova;
- 2) izvršava zaključke sabora;
- 3) stara se o organizaciji vjerske obuke, utvrđuje nastavne planove i programe;
- 4) vrši opšti nadzor nad radom nižih vjerskih škola, tečajeva i vršenja vjerske obuke;
- 5) postavlja, premješta i razrješava sve vjerske službenike kao i administrativne službenike starješinstva i ustanova koje stoje pod njegovim neposrednim nadzorom;
- 6) odobrava budžete i završne račune odbora, samostalnih i ujedinjenih vakufa iznad određene visine;
- 7) daje odobrenje za izgradnju objekata namijenjenih za vjerske potrebe, kao i za njihove veće opravke;
- 8) odobrava promjene svrhe i eventualno rušenje dotrajalih objekata;
- 9) donosi odluku o prihvatanju osnivanja vakufa;
- 10) stara se o cjelishodnom upravljanju cjelokupnom imovinom Islamske zajednice;
- 11) donosi konačna rješenja po žalbama na odluke nižih organa;
- 12) podnosi izvještaj o svome radu saboru Islamske zajednice i Vrhovnom islamskom starješinstvu;
- 13) predlaže saboru budžet i završni račun;
- 14) odobrava svaku kupovinu, prodaju ili zamjenu nepokretne imovine Islamske zajednice i
- 15) u određenim hitnim i neodložnim poslovima donosi odluke iz nadležnosti sabora u skladu sa odredbama statuta i podnosi ih na odobrenje na prvom narednom zasjedanju sabora.

Tekuće poslove vrši predsjednik starješinstva u skladu sa statutom.

Izuzetno, u hitnim i neodložnim poslovima, a u skladu sa statutom, predsjednik starješinstva može donositi odluke i dužan ih je podnijeti starješinstvu na odobrenje na prvoj sjednici.

Starješinstvo može imenovati savjete i druga stručna tijela za pribavljanje mišljenja o pojedinim stručnim pitanjima.

Član 32.

Sredstva za pokriće budžetskih rashoda sabora, starješinstava i njihovih ustanova obezbjeđuju odbori Islamske zajednice srazmjerno broju pripadnika Islamske zajednice na njihovom području i imovinskom stanju odbora.

Posebnim propisom određuje se bliži kriterij i način prikupljanja ovih sredstava.

VRHOVNI SABOR ISLAMSKJE ZAJEDNICE

Član 33.

Vrhovni sabor Islamske zajednice je najviši organ Islamske zajednice u Socijalističkoj Federativnoj Republici Jugoslaviji.

Vrhovni sabor ima 35 članova koje biraju sabori iz svoje sredine, i to;
Sabor u Sarajevu 13 članova,
Saboru Prištini 12 članova,
Sabor u Skoplju 7 članova i
Sabor u Titogradu 3 člana.

Najmanje jedna trećina članova Vrhovnog sabora treba, po mogućnosti, da ima vjersku naobrazbu.

Član 34.

Mandat članova Vrhovnog sabora traje 4 godine, ali Vrhovni sabor obavlja ustavom propisane poslove i po isteku mandata sve dok pojedini sabori ne izvrše izbor novih članova Vrhovnog sabora.

Izbor članova Vrhovnog sabora vrše sabori na prvoj sjednici na kojoj se vrši konstituisanje.

Član 35.

Sredstva za pokriće budžetskih rashoda Vrhovnog sabora, Vrhovnog islamskog starješinstva i njegovih ustanova obezbjeđuju sabori putem odbora srazmjerno broju pripadnika Islamske zajednice na njihovu području i imovinskom stanju odbora. Posebnim propisom određuje se bliži kriterij i način prikupljanja ovih sredstava.

Član 36.

Vrhovni sabor:

- 1) donosi ustav i druge propise;
- 2) daje smjernice za upravljanje imovinom Islamske zajednice i za rad njenih organa;
- 3) donosi budžet i završni račun Vrhovnog sabora;
- 4) osniva ustanove;
- 5) bira, opoziva i razrješava članove Vrhovnog islamskog starješinstva iz redova Vrhovnog sabora;

- 6) izdaje ovlaštenje Reis-ul-ulemi za vršenje vjerskih poslova (menšura);
- 7) bira i razrješava predsjednike starješinstva na predlog Reis-ul-uleme;
- 8) razmatra i odobrava izvještaje Vrhovnog islamskog starješinstva o njegovu radu;
- 9) poništava propise i odluke sabora koji su u suprotnosti sa Ustavom, odlukama i propisima Vrhovnog sabora i Vrhovnog islamskog starješinstva donesenih u okviru njegovih ovlaštenja;
- 10) donosi propise o kvalifikacijama svih vjerskih službenika na predlog Vrhovnog islamskog starješinstva.

Član 37.

Vrhovni sabor ima predsjednika, dva potpredsjednika i sekretara.

Član 38.

Zasjedanja Vrhovnog sabora su redovna i vanredna. Redovno zasjedanje Vrhovnog sabora saziva se, po pravilu, u mjesecu decembru svake godine.

Vanredno zasjedanje Vrhovnog sabora saziva se kada se za to ukaže potreba ili na pismeno obrazloženi zahtjev najmanje jedne trećine članova.

Zasjedanja saziva predsjednik Vrhovnog sabora.

Član 39.

Predlog za promjenu Ustava Islamske zajednice može staviti jedna trećina članova Vrhovnog sabora, Vrhovno islamsko starješinstvo ili pojedini sabori. Kada predlog ne stavlja Vrhovno islamsko starješinstvo, pribaviće se prethodno njegovo mišljenje.

O promjenama Ustava Vrhovni sabor može rješavati, ako sjednici prisustvuje najmanje tri četvrtine njegovih članova, a odluke se donose većinom od najmanje tri četvrtine glasova prisutnih članova.

Član 40.

Vrhovni sabor donosi Poslovnik o svome radu.

VRHOVNO ISLAMSKO STARJEŠINSTVO ISLAMSKE ZAJEDNICE U SFRJ

Član 41.

Vrhovno islamsko starješinstvo Islamske zajednice u SFRJ je izvršni organ Vrhovnog sabora.

Sjedište Vrhovnog islamskog starješinstva je u Sarajevu.

Član 42.

Vrhovno islamsko starješinstvo sačinjavaju: Reis-ul-ulema kao predsjednik, a kao članovi predsjednici starješinstava i šest članova koje bira Vrhovni sabor iz svoje sredine.

Mandat članova Vrhovnog islamskog starješinstva traje do izbora novog Vrhovnog islamskog starješinstva.

Vrhovno islamsko starješinstvo predstavlja vjersko jedinstvo pripadnika Islamske zajednice u Socijalističkoj Federativnoj Republici Jugoslaviji.

Član 43.

Vrhovno islamsko starješinstvo vrši naročito ove poslove:

- 1) određuje osnovne smjernice vjerskog života;
- 2) vrši opšti nadzor nad cjelokupnim vjerskim životom;
- 3) izvršava odluke Vrhovnog sabora;
- 4) daje obavezna tumačenja o vjerskim pitanjima;
- 5) odlučuje o načelnim razilaženjima između pojedinih starješinstava i o njihovim sukobima nadležnosti;
- 6) donosi propise o rangu vjerskih škola;
- 7) donosi propise o vjerskoj štampi i njenom rasturanju;
- 8) donosi propise o službeničkim odnosima službenika Vrhovnog islamskog starješinstva;
- 9) rješava žalbe protiv odluka starješinstva u posljednjoj instanciji;
- 10) podnosi izvještaj Vrhovnom saboru o svom radu;
- 11) izdaje uputstva i vrši opšti nadzor nad pravilnim upravljanjem imovinom Islamske zajednice;
- 12) priprema zasjedanje Vrhovnog sabora Islamske zajednice;
- 13) predlaže Vrhovnom saboru budžet i završni račun;
- 14) izvršava budžet.

Član 44.

Vrhovno islamsko starješinstvo može po pravu nadzora poništiti svaku odluku starješinstva za koju smatra da nije u skladu sa Ustavom Islamske zajednice i drugim propisima i smjericama.

REIS-UL-ULEMA

Član 45.

Reis-ul-ulema je vrhovni vjerski poglavar i vjerski predstavnik Islamske zajednice u Socijalističkoj Federativnoj Republici Jugoslaviji. On stoji na čelu Vrhovnog islamskog starješinstva.

Kad je Reis-ul-ulema spriječen u vršenju poslova, zamjenjuje ga član Vrhovnog islamskog starješinstva koga on odredi.

U slučaju upražnjenja mjesta Reis-ul-uleme Vrhovno islamsko starješinstvo određuje jednog od svojih članova koji će tu dužnost obavljati do izbora novog Reis-ul-uleme.

Član 46.

Reis-ul-ulemu bira posebno izborna tijelo koje sačinjavaju: članovi Vrhovnog sabora, predsjednici i članovi starješinstava, muftije i direktori vjerskih škola.

Izbor Reis-ul-uleme se vrši na način propisan posebnim Pravilnikom koji donosi Vrhovni sabor.

Član 47.

Reis-ul-ulema:

- 1) izdaje ovlaštenja (murasale) za vršenje vjerskih poslova predsjednicima starješinstava i hatibima;
- 2) vrši nadzor nad radom starješinstava i nižih organa;
- 3) obilazi krajeve u kojima žive pripadnici Islamske zajednice u cilju uzdizanja vjerskog života i razvijanja islamske svijesti;
- 4) predstavlja Islamsku zajednicu u zemlji i inostranstvu i održava neposredne veze sa islamskim zajednicama u drugim zemljama;
- 5) postavlja, premješta i razrješava službenike Vrhovnog islamskog starješinstva i njegovih ustanova;
- 6) odobrava odsustva predsjednicima starješinstava Islamske zajednice i direktorima vjerskih škola o kojima se stara Vrhovno islamsko starješinstvo;
- 7) obavlja neodložne poslove iz nadležnosti Vrhovnog islamskog starješinstva u vrijeme kada ovo ne zasjeda i o tome ga izvještava na prvoj narednoj sjednici.

Reis-ul-ulema ima pravo da zadrži od izvršenja svaku odluku starješinstva koja se odnosi na vjerski život, ako ocijeni da ona nije u skladu sa islamom i interesima Islamske zajednice. Konačnu odluku o tome donosi Vrhovno islamsko starješinstvo.

IZBOR I OPOZIV ORGANA ISLAMSKE ZAJEDNICE

Član 48.

Pripadnici Islamske zajednice koji su navršili 18 godina života i koji nisu pod starateljstvom ostvaruju biračko pravo na način propisan statutima pojedinih sabora.

Član 49.

Svaki funkcioner Islamske zajednice odgovoran je za svoj rad višem organu, odnosno svom izbornom tijelu, a može biti opozvan kada se utvrdi:

- 1) da je njegovo držanje i rad u suprotnosti sa propisima Islama;
- 2) da je svoj položaj zloupotrijebio na štetu interesa Islamske zajednice i otadžbine;
- 3) da je nesposoban da obavlja svoju dužnost;

4) da je osuđen za krivična djela protiv naroda i države, ili za nečasna djela.

Odluku o opozivu donosi organ koji je odnosno lice izabrao.

VJERSKE ŠKOLE I DRUGE USTANOVE

Član 50.

Islamska zajednica ima svoje vjerske škole za osposobljavanje pripadnika Islamske zajednice za vjerske službe.

Osnovna vjerska obuka vrši se na način propisan statutom sabora.

Troškovi vjerskih škola padaju na teret odgovarajućeg sabora, ukoliko Vrhovni sabor ne odluči drukčije, ili, ukoliko se ne radi o višoj ili visokoj školi ili fakultetu.

Propise o ustrojstvu i radu kao i nastavne planove i programe škola koje padaju na teret budžeta Vrhovnog sabora donosi Vrhovno islamsko starješinstvo. Za ostale škole nadležna su starješinstva uz saglasnost Vrhovnog islamskog starješinstva.

Tečajevi i seminari za osposobljavanje i usavršavanje vjerskih službenika osnivaju se i rade na način propisan statutima.

Član 51.

Ustanove Islamske zajednice pored škola jesu: biblioteke, muzeji Islamske zajednice i drugo.

ZAVRŠNE I PRELAZNE ODREDBE

Član 52.

Kolegijalni organi Islamske zajednice rade na sjednicama i mogu da odlučuju ako je na sjednici prisutno najmanje dvije trećine članova, a odluke donose većinom glasova prisutnih članova, ukoliko nije drukčije propisano.

Član 53.

Budžetska i računska godina odbora, sabora i Vrhovnog sabora počinje 1. januara, a završava se 31. decembra.

Član 54.

U roku od pet godina od dana stupanja na snagu ovog ustava za muftiju može biti postavljeno i lice koje je vršilo dužnost glavnog imama najmanje pet godina, a ima više teološko obrazovanje, kao i lice koje je vršilo tu dužnost ili dužnost predsjednika starješinstva najmanje deset godina, a završilo je najmanje Gazi Husrev-begovu medresu ili njoj ravnu vjersku školu.

Član 55.

Glavni imami vrše svoju dužnost i dalje po dosadanjim propisima do izbora muftija.

Član 56.

Sabori su dužni donijeti svoje statute na prvom zasjedanju poslije stupanja na snagu ovog ustava.

Član 57.

Doneseni propisi stupaju na snagu osmog dana po objavljivanju u Glasniku Islamske zajednice, odnosno osmog dana po objavljivanju u vidu posebne edicije.

Član 58.

Ovaj ustav stupa na snagu na dan donošenja.

Predsjednik Vrhovnog sabora
Dr Mustafa Karnarić, s. r.